

SKI

## Grondius final dalla stagiun

Buca mo il suleagl ha splendurau l'entira fin d'jamna, mobein era atletas ed atletes dil Flimsenstein Raceteam.

A Sursaiisa ei stau uonn il final dil Grand Prix Migros. Tiels buobs dall'annada 2009 ha *Julien Landolt* gudignau la sonda sensaziunalmein aur el slalom gigant. *Cla Feltscher* ha contonschiu il fetg bien 12avel plaz. Era *Linnea Boije* ei seclassada tier las mattatschas 2007 sil fetg bien novavel rang.

Is affons pli giuvens han giu d'absolver la sonda il schinumau Combirace, en quel ei *Gada Camathias* da Laax daventada 32avla sco la partecipanta absolutamein pli giuvna (nasch. 31-12-2014). *Sylvie Tschuor* da Sagogn e *Mea Feltscher* da Flem ein vegnidas mintgamai 37avlas en lur categorias (Sylvie annada 2012 e Mea 2011). *Nayla Blumenthal* da Falera (annada 2010) ei vegnida 40avla e tiels buobs annada 2014 ha *Charly Smith* fatg il 12avel e *Severin Huber* da Flem il 28avel rang.

**Benis Super G**

La medema sonda ein quels ch'ei «restai a casa» separticipai alla cuorsa «Benis Super G» sil Crap Sogn Gion. Il resultat ei staus fenomenals per nus: duas gada il meglier temps dil gi e silla pista liunga e silla cuorta sco era 3 ga aur, 3 ga argien, ina gada bronz ed ulteriurs fetg buns plazz han ils atletes da FS Raceteam contonschiu. Silla pista cuorta ha *Gianin Brubin* fatg il meglier temps dil gi ed ha gudignau aur en sia categoria, *Cédric Huber* ei vegnius secund e *Timo Arpagaus*



Buca mo il suleagl ha splendurau la davosa fin d'jamna.

FOTO MAD

tschunavel. *Marius Hossli* ha gudignau aur tiels buobs 1 e *Nina Cathomen* argien tier las mattatschas 2. *Tomasch Camathias* tier ils buobs 2 ei vegnius 10avel e *Tim Sgrist* tiels buobs 1 novavel.

Silla pista liunga ha *Lena Knight* fatg il meglier temps dil gi e gudignau aur ella categoria damas junioras. Ella medema ei *Samara Meiler* vegnida tschunavla. *Norina Bruhin* ha astgau pender entuorn culiez la medaglia d'argen tier la categoria mattatschas 4 e *Simoni Camathias* tier las damas 2. *Jan Killer* ei vegnius tschunavel tiels buobs 4.

La dumengia eis ei u vinavon a Sursaiisa cul final dil GPM. Il program ha continuau cul slalom gigant dils pigns. Gada Camathias ha quella gada fatg il

34avel rang, *Sylvie Tschuor* il 27avel e *Mea Feltscher* 38avel. *Nayla Blumenthal* e *Severin Huber* han fatg mintgamai en lur categorias il 40avel rang e *Charly Smith* ei vegnius 12avel.

Silla pista gronda ei stau la cuorsa combinada. *Julien Landolt* ei vegnius siatavel e *Cla Feltscher*, suenter ch'el ei bunamein ruclaus, 29avel. *Linnea Boije* ei deplorablamein dada ora e *Nico Inauen* ha muncau deplorablamein il final d'uonn pervia d'ina blessura. Ad el giavischchein nus bien megliurament.

Wow – tgei fin d'jamna! A tuttas atletas ed a tuts atletes cordiala gratulaziun per lur super prestaziun.

FS Raceteam, Flem

FORUM

## Ina magnifica senda d'unviern a Trun

Igl unviern per propi ei vargaus. Forsa il dretg mument per dar in cuort sguard anavos. Nus vein saviu guder in bi unviern cun avunda neiv, bial'aura e bunas cundiziuns per pistas, loipas ed era pil glatsch natural. Cheu less jeu denton inaga far menziun dalla senda d'unviern a Trun, ina senda da spassegiar che meina per liung dil Rein, tras uauls d'ogna e securarla per part cun la senda d'art. L'ogna alva da neiv e cambrida ha magari procurau per maletgs espectaculars ed ina atmosfera sco en ina praula. Moviment en ina tala natira fa bein a tgerp ed olma. La senda d'unviern a Trun ei lu era vegnida frequentada stediamein dad jasters ed indigens. Per ch'ina tala senda sappi survir ad interessentas ed interessents drova ei naturalmein glieud che fa las lavurs da preparaziun e da manteniment. Ei ha num far turas cul quad empau

da tuttas uras per ulivar e stignar la neiv nova, mo era per sgarar e sluccar il vial cu la senda vegn memia dira. *Roland Albin* e ses dus gidonters *Mario Caviezel* e *Lucas Defuns* han prestau fetg buna lavur. Ei ha franc duvrau engaschi e perseveronza da mantener la senda en buna cundiziun. Contas uras ch'els han unfriu per quella impurtonta lavur san mo els sez. Els meretan in grond laud ed engraziament. Il quad, la maschina da far la senda, s'auda a Trun Turissem che surpren era ils cuosts. Il manteniment dalla senda d'unviern ei ina accziun en favur dil turissem, denton era dils indigens. Tgei valeta ch'ina tala senda ha, san mo quels ch'han fatg diever dad ella, e quei ein buca paucs.

Giusep Decurtins-Deplazes



FS Raceteam, Flem

## LA QUOTIDIANA

Editura: Somedia Press AG  
 Editur: Hanspeter Lebrument  
 CEO: Thomas Kundert

Editura Somedia  
 Via Sommerau 32, 7007 Cuiria;  
 tel. 081 255 50 50,  
 mail: verlag@somedia.ch

**Redaziun responsabla:**

Fundaziun Medias Rumantschas (FMR):  
**Schefredactor FMR:** David Truttmann (dat)  
**Substitutschefredactor FMR:**  
 Hans Huonder (hh), Sandro Buchli (sb)  
**Redaziun FMR:**  
 Augustin Beeli (abc), Andreas Cadonau (ac),  
 Daniela Derungs (dd), Flurin Andry (fa, correctorati),  
 Gabriela Desax (gd, correctorati),  
 Madlaina Capeder (mc, correctorati),  
 Annatina Filli (afi), Nadja Lucchinetti (nl),  
 Susi Rothmund (sr), Andri Netzer (an),  
 Sandra Balzer (sab), Martin Gabriel (mg),  
 Tanja Jäger (tj), Lisa Peers Dermont (lpd),  
 Martin Camichel (cam).

**Adressas redaziunalas:**

FMR Fundaziun Medias Rumantschas,  
 Via da Masans 2, 7000 Cuiria, 081 544 89 10  
 mail: redaziun@fmr.ch  
 secretariat: 081 544 89 11

www.fmr.ch

**Servetsch d'abunents e da distribuziun:**

Via Sommerau 32, 7007 Cuiria,  
 tel. 0844 226 226,  
 mail: abo@somedia.ch

**Inserats:**

**Somedia Promotion,**  
 Städtlistrasse 12, 7130 Glion  
 tel. 081 920 07 17, fax 081 920 07 18,  
 mail: ilanz.inserate@somedia.ch

La Quotidiana cumpara tschintg giadas ad emna

**Ediziun derasada, Südostschweiz cumplet:**  
 66 466 exemplars (WEMF, 2021)  
 Derasaziun: 115 803 lecturas e lecturas  
 (MACH-Basic 2021-1)

La Somedia Press AG è possessura dals titels  
 «Fögl Ladin», «Gasetta Romontscha», «Casa  
 Paterna/La Pünt» e «La Vouch da Surmeir».

**Pretschs d'abunaments sut:**  
 www.suedostschweiz.ch/aboservice

**Communicaziun da participaziun considerablas  
 sin fundament da art. 322 CP:**

nagin

© Somedia

FORUM

## Eleccziun dalla regenza, 15 da matg 2022

Las eleccziuns en la regenza ein bein las pli impurtontas da nies cantun. Ei secapescha per mintga votant e scadina votanta che persunalitads cumpetentas e cumprovadas duein appartener alla regenza grischuna. Ils 15 da matg duein pia tuttas votantas e tuts votants far diever da lur dretg ed ir a l'urna ni tarmetter per posta il ceder da votar.

La partida dil center ei en la situaziun ventireivla ch'ella sa proponer per l'eleccziun en la regenza treis persunalitads profiladas e cumprovadas. Duas da quellas, *Jon Domenic Parolini* e *Marcus Caduff* ein secumprovai gia dapi 8 resp. dapi 4 onns en la regenza e quei cun grond success. Cun gronda cumpetenza ed iniziativa han els tgamunau lur departaments e durant ils dus onns d'epidemia han el culs dus auters collegas en la regenza defendiu bravurusamein ils interess da nies cantun.

Els meretan ina reelecziun pli che mo honorifica.

Dunna *Carmelia Maissen* ei medemamein ina candidata cumpetenta e cumprovada per in post en la regenza grischuna. Ella disponna d'ina solida e vasta scolaziun ed era gia d'ina gronda experienza politica sco presidenta dalla vasta vischnaunca da Glion. Quei ein segiramain bunas premissas per ina eleccziun en la regenza. E sil pli pauc ina dunna sto appartener a nossa pli aulta autoritad cantunala.

Tuts treis candidats dalla partida dil center han ina stretga relaziun cun lur regiun ed enconuschan aschia ils basegns e quitaus dalla populaziun grischuna. Jeu vegnel pia ad ir a l'urna e votar per tuts treis cun gronda perschasiun.

Ignaz Cathomen, Falera

FORUM

## Igl elan ei il motor, il dubi il frein – la cumbinaziun decisiva

«La pretensiuon da serrar las terrasas dils territoris da skis ei buca patertgada a fin. Anzi, tala tucca buca la noda e sa esser contraproductiva.» Cun quels clars plaids ha il cusseglier guvernativ *Marcus Caduff* mussau colur e responsabladad enviers nies pli grond pilaster economic cantunal, il turissem. Sco minister dall'economia cantunala e commember da suprastanza da Svizra Turissem sa el da tgei ch'el discuora. Carschius si ella Lumnezia survegn Caduff mess en tgina l'impurtanza ed igl 1 x 1 dil turissem, denton era la basa dall'agricultura. In sa dir, ch'in cusseglier guvernativ grischun ei aunc mai staus aschi datier dall'economia e la basa sco durant ils dus davos onns signai dalla pandemia. Durant il stemprau

s'auda il capitani silla punt dil bastiment. *Marcus Caduff* ha tratg en la pelerina melna e tgamunau exemplaricamein il bastiment el stemprau che ha cuzzau varga dus onns. Sco cusseglier guvernativ flurescha Caduff durant las sessiuns dil Cussegl grond cun sia vasta cumpetenza dil fatg nua ch'el s'engascha cun tutta perschasiun pil beinstar dil generaleesser. El ei buca igl um dils gronds plaids mobein igl um dil cuntegn. El ei semplamein il «Marcus motor». Il 15 da matg 2022 mereta *Marcus Caduff* ina honorifica reelecziun sco cusseglier guvernativ.

Maurus Tomaschett  
 deputau dall'Alianza dil Center, Breil

FORUM

## Sensaziun a Mustér, seprofitei!

Nossas visiuns van plaun, plaunet en vigur. Sper il tuctuc, ch'ei ina caussa sensaziunala ella Cadi, vul la suprastanza communal da Mustér cun *René Epp* era far enzatgei per la glieud attempada che sa buca ir entuorn cun ina app. Per che indigens e hospis da vacanzas che vulan haver contact cun vischins e vischinas sil grond intschess communal – e buca mo el center – vegnin nus a continuar cun nossa mudesta purschida che nus havein lantschau igl onn vargau. Ei ha tunschiu da plazzar enzaconts paucs bauns ella vischinonza dil vitg. La suprastanza communal ei cuncienta dalla necessitad (mira fotografia), ha denton neginas reservas da far pli grondas investiziuns, quei malgrad ch'igl ei enconuschent ad ella che la vischnaunca da Sumvitg ha sin siu intschess buca meins che 72 beinmanteni bauns per far in paus. Per tener petg cun las vischnauncas vischinontas vul la suprastanza communal far tut sforz d'augmentar era en quella

sparta la modernisaziun dil vitg plein svilup. Ella quenta cun il ferm sustegn e cumpleina capientscha dils pagataglia. La vischnaunca da Mustér sa buca selubir da far novs deivets. Consequentamein stuess ella en buca ditg puspei alzar il pei da taglia, investass ella nunprecautamein aunc 50 bauns novs. Per denton porscher maun alla populaziun e far bunaveglia a vischins e vischinas per saver far investiziuns pintgas, vul ella reparter secrets da participaziun [SP] da mintgamai 100 francs il toc. Il cumprader obtegn 6% tscheins annual e suenter 25 onns vegn pagau anavos igl importo empristau. Ils SP san vegnir acquistai oz venderdis el plaun terren dalla canzia communal a desertina. Cun quei ch'igl ei da quintar cun ina pli gronda fuola d'interessents, indigens e hospis da vacanzas, ei la sala da sedutas aviarta naven dalle 09.30 – 14.00.

Rita Furger, Mustér



FOTO RITA FURGER